

“Dare impostas e in presse a massajos e pastores. Custa est sa chistione de prus importu pro s’assessore rezionale a sa Massaria Oscar Cherchi, e chi devet ghiare che a unu faru s’atzione politica”.

Est cumintzada su 5 de santugaine s’andala de Oscar Cherchi, in antis assessore rezionale a s’Industria e chi dae pagu tempus ghiat unu setore cumplessu che a sa Massaria. 46 annos de Tatari ma pesadu in Aristanis, at sas ideas meda craras pro faghene fronte e chircare de isolvere sas peolas chi pertocant sa massaria e su pastoriu sardu. Est chircende, cun rispetu mannu e cun cuidadu, de ghiare unu setore cunsideradu de importu mannu e galu determinante pro s’economia de unos cantos zassos de Sardinna, finas che a su de Aristanis inue istat dae cando aiat 18 annos. “M’apo a impinnare – narat Cherchi – pro isolvere unas cantas chistiones chi pro mene benint prima de totu, comente, pro narrere, su preju de su late. Apo zai fatu un’addòviu pro pònnere paris totu sas partes interessadas e non mi firmo finas si a primu addòviu sos indùstriales non bi sunt bènnidos. So zai prontu a torrare a faghene zoviare totu sas partes interessadas pro s’àtera chida. Dae cando apo cumintzadu a traballare pro cust’assessoradu – narat Cherchi –apo traballadu mascamente subra su PSR pro chircare de aumentare sos gastos. Amus galu a disponimentu 100 miliones de èuros e depimus resessire a los gastare intro su mese de nadale, si nono arriscamus de los pèrdere. Non podo permitere chi custu càpitet e est pro custu chi mi so moende pro nche dogare totu sos impèigos chi non resessint a faghene allegare duos sistemas informativos. So faeddende de cussu tzentrale romanu de Agea a su cale s’apozant sos pagamenti de totu sas reziones e su nostru de Argea. Est unu problema pràticu de zestione ca bastat chi sos metros cuadros de unu terrinu non torrent in unu sistema e in s’àteru, chi custu non permitit de lu riconnòschere e duncas de lu lèghere. So chircende de cumbìnchere Agea a atzetare su sistema rezionale nostru, sinducas at a chèrrere a agatare un’àtera manera pro non sighire a pèrdere tempus e isolvere su problema”.

Ischinde chi su dovere de prus importu est de dare impostas concretas a sa zente e a totu sos zassos de Sardinna, Cherchi at inditadu unu disinnu de praticare pro sa massaria e su pastoriu sardu finas si custu at a mudare cumpretamente su connotu.

“Unas de sa chistiones de prus importu est cussa chi pertocat sos consòrtzios de bonifica, firmos in una cundizione chi oramai andat a dae in antis dae unos cantos annos. Creo chi siat pretzisu a pagare sos dèpidos e torrare a sos consòrtzios su rolu de bundu chi mèritant. Epro faghene custu – narat galu s’assessore a sa Massaria – tocat de mudare sa leze de riforma”. Cun abistesa, e paret chi nde zugat meda, s’assessore narat chi cheret sighire sa riforma de sos entes agrìculos. “Tres azentzias chi non faeddant intre issas, ca rapresentan cada una unu mundu a contu suo, non

podent azuare a aumentare sa crèschida. Pro semplificare, bi cheret una azeria ebia cun tres dipartimentos.

Pro su chi pertocat sa leze 44,- sighit Cherchi – pesso chi est pretzisu a suspèndere sos pagamentos pro tancare pro semper sa partida”. Pagas paraulas ebia pro sa chistione de Cirra. “In custas dies – narat s’assessore – apo a andare a Foghesu e a pustis apo a pedire unu interventu de su Guvernu chi at galu sa responsabilidade de su poligону, pro tancare finas custa chistione”.

Semper prus a s’ispissu sos zòvanos non abarrant in campanna sighende a traballare in s’impresa de familia, ca peasant chi custu traballu non cumbenzat ca non rendet e duncas no lis agradat.

Dimando a s’assessore si oe est galu possibile chi custu setore crescat e chi duncas podant aumentare sos ocupados. Custu tema paret chi l’apassionet e deretu m’amentat chi b’at contributos europeos pro sos imprendidores zòvanos pro abèrrere impresas noas.

“Semus in una terra addata a sa massaria e a su pastoriu, unu tempus s’economia nostra fiat cussa e sa zente campaiat dae cussu. Oe est netzessàriu a abaidare a su tempus benidore cun isperu chirchende de pònnere in pràtica sas tecnolozas noas, impreadas meda in s’Itàlia de su nord, e sos resurtados de sa chirca sientifica. In Gaddura amus un’assempru de capia de bacarzos zòvanos chi ant punnadu a unu frutu de gabale siat comente a calidade che a zenealozia. Petzi cun custas calidades – narat Cherchi – est possibile a intrare in unu mercadu cumpetitivu. No esistint prus sos contributos dados a cudda manera. S’Unione Europea imponet livellos de calidade artos siat pro su pastoriu siat pro sa massaria. Custa est s’ùnica manera pro pòdere campare in unu mercadu globale. Tocat de crèschere, bisonzat de s’addatare e àere una mentalidade aberta. In Sardinna – concruit Oscar Cherchi – depimus resessire a aunire e custu balet finas pro sas enerzias alternativas de praticare in sa massaria. S’assempru de s’Ispanna cun sas serras fotovoltaicas, nos narat chi cun sas enerzias alternativas si podet a beru balanzare”.